



Broj/Број: 4/1-50-1-149-11/04
Sarajevo/Сарајево: 31.08.2004. godine

ZAPISNIK

Jedanaeste sjednice Zajedničke komisije Parlamentarne skupštine BiH za odbrambenu i sigurnosnu politiku i nadzor nad radom odbrambenih i sigurnosnih struktura na nivou BiH koja je održana u 31.08. 2004. godine u vremenu od 11,00 do 16,05 sati.

Sjednici su prisustvovali članovi Zajedničke komisije: Šefik Džaferović, Branko Zrno, Seada Palavrić, Osman Brka, Momčilo Novaković, Adem Huskić, Boško Šiljegović, Vinko Zorić, Halid Genjac, Vinko Radovanović i Anto Spajić.

Sjednici nije prisustvovao Mirko Blagojević.

Sjednici su prisustvovali gosti : Marina Pendeš i Enes Bećirbašić, zamjenici ministra odbrane BiH, Vesko Drljača i Samir Izvor, predstavnici Ministarstva sigurnosti BiH, Dragiša Samardžija i Robert Perić, predstavnici DGS-e, Enes Zukanović, ekspert Parlamenta FBiH , Christian Haupt iz OSCE-a, te predstavnici OHR-a i Evropske policije.

Pored navedenih, sjednici prisustvovali su Dragica Hinić, privremeni sekretar Zajedničke komisije i Željko Grubešić, ekspert za pomoć u radu Zajedničke komisije.

Sjednicom je predsjedavao Boško Šiljegović.

Za raspravu na sjednici predložen je slijedeći

DNEVNI RED:

1. Verificiranje zapisnika 9. i 10. sjednice Zajedničke komisije;
2. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu (predlagač: poslanik Momčilo Novaković);
3. Razmatranje Prijedloga zakona o Državnoj graničnoj službi (predlagač: Vijeće ministara BiH);
4. Razmatranje Prijedloga zakona o nadzoru i kontroli prelaska državne granice (predlagač: Vijeće ministara BiH);
5. Razmatranje i sublimiranje poslaničkih prijedloga zaključaka proisteklih prilikom rasprave na Predstavničkom domu o Informaciji o stanju sigurnosti BiH;
6. Informiranje o stanju popunjenosti ljudstvom Ministarstva odbrane BiH (izvjestioci: ministar odbrane BiH i zamjenici ministra odbrane BiH);
7. Tekuća pitanja.

Predloženi dnevni red usvojen je jednoglasno, s tim da je na prijedlog predstavnika Ministarstva odbrane BiH , jednoglasno prihvaćeno da se razmatranje tačke 6. pomjeri unaprijed, te da se razmatra kao tačka 3. dnevnoga reda, uslijed čega dolazi do pomjeranja i ostalih tačaka dnevnog reda.

Ad.1.

Članovi Zajedničke komisije jednoglasno su usvojili zapisnike 9. i 10. sjednice Komisije.

Ad.2. Razmatranje Prijedloga zakona o učestvovanju pripadnika Oružanih snaga Bosne i Hercegovine, državnih službenika i ostalih zaposlenih u mirovnim operacijama i drugim aktivnostima u inostranstvu

Boško Šiljegović dao je kratak pregled dosadašnjeg rada u vezi s predloženim Zakonom, te informirao o obavezi radne grupe koju je sačinjavao predlagač Zakona, predstavnici Ministarstva sigurnosti BiH i predlagači amandmana da do sjednice Komisije usaglase stavove o Prijedlogu zakona.

Momčilo Novaković istaknuo je da je pomenuta radna grupa održala nekoliko sjednica, a zadnju sjednicu neposredno prije održavanja sjednice Komisije. Tom prilikom osim jednog amandmana VII. na član 4., usaglašeni su svi amandmani iza kojih stoji Ministarstvo odbrane, kao i amandmani Vinka Zorića iza kojih stoji Ministarstvo sigurnosti, s tim da postoji izvjesno preplitanje amandmana datih od strane ova dva ministarstva, koje bi oni trebali usaglasiti. O neusaglašenim amandmanima vodila bi se rasprava na Komisiji.

Šefik Džaferović naveo je da po njegovom mišljenju egzistiraju dvije grupe amandmana na Prijedlog zakona, tako da bi trebali prihvatiti jednu ili drugu grupu amandmana. Mišljenja je da su amandmani Nenada Mišića iza kojih stoji Ministarstvo odbrane najbliži rješenju i spreman ih je prihvatiti. Također, moguće je prihvatiti još neke amandmane koji poboljšavaju tekst Prijedloga zakona, kao što su amandmani g-đe Palavrić. Postoje i amandmani Vinka Zorića iza kojih stoji Ministarstvo sigurnosti a koji tretiraju status policijskih službenika i koje bi također trebali ugraditi. Potom je predložio da se na sjednici Komisije otvori rasprava o uloženim amandmanima ili da se odgodi za narednu sjednicu, do kada bi predstavnici Ministarstva sigurnosti BiH i Ministarstva odbrane BiH trebali usaglasiti amandmane čiji su faktički predlagači.

Marina Pendeš saglasila se s prijedlogom da predstavnici Ministarstva odbrane i Ministarstva sigurnosti usaglase amandmane iza kojih stoje i sačine prečišćeni tekst tako usaglašenog prijedloga.

Seada Palavrić istaknula je da je svaka nova sjednica prouzrokovala nova nerješena pitanja i nejasnoće vezane za Prijedlog zakona. Zatim je istaknula da povlači amandmane III., IV., V. i VII. Upitala je da li u tekstu treba termin zaposleni treba zamjeniti riječju zaposlenici i da je pri tome potrebno izdefinirati taj termin. Predložila je također da dva ministarstva usaglase amandmane između sebe a potom i s predlagačem Zakona, te da se izregulira pitanje državnih službenika u dijelu njihovih obaveza.

Vinko Radovanović mišljenja je da je na današnju sjednicu Komisije trebao biti dostavljen usaglašen materijal. Kako to nije slučaj predložio je da se do naredne sjednice Komisije izvrši usaglašavanje i dostavi prečišćen tekst Prijedloga zakona s ugrađenim usaglašenim amandmanima.

Boško Šiljegović istaknuo je potom da je radna grupa uradila obiman posao, usaglasila najveći mogući broj amandmana, a kako je Zajedničkoj komisiji na samoj sjednici dostavljen još jedan amandman, predložio je donošenje zaključka, kojim učesnici radne grupe koja uključuje predlagača zakona, predlagače amandmana, te predstavnike Ministarstva odbrane BiH i Ministarstva sigurnosti BiH, u roku od 7 dana trebaju pokušati postići saglasnost u što većoj mjeri, kako bi smo dobili što kvalitetniji Prijedlog zakona.

Šefik Džaferović potom je precizirao tekst **zaključka**, koji su članovi Komisije jednoglasno usvojili, a glasi:

Učesnici radne grupe koja uključuje predlagača zakona, predlagače amandmana, te predstavnike Ministarstva odbrane BiH i Ministarstva sigurnosti BiH, u roku od 7 dana, trebaju nastojati postići saglasnost o predloženim amandmanima, kako bi Zajednička komisija na narednoj sjednici imala pregled usaglašenih amandmana, kao i tekst Prijedloga zakona s ugrađenim amandmanima, te se izjasnila o samom Prijedlogu zakona u cjelini.

Ad.3. Informacija o stanju popunjenosti ljudstvom Ministarstva odbrane BiH

Marina Pendeš informirala je da je zaključkom Zajedničke komisije Ministarstvo odbrane BiH obavezano na davanje predmetne informacije. Naglasila je da Ministarstvo odbrane nije popunjeno traženim procentom ljudstva od 65%, te naglasila određene razloge za to. Jedan od razloga je i činjenica da je popuna, do usvajanja Pravilnika o unutrašnjoj organizaciji Ministarstva odbrane BiH, vršena po postojećem Pravilniku Stalnog komiteta za vojna pitanja. Ovi pravilnici su dosta različiti, te stoga i nije izvršena popuna u potpunosti. Postoje također i određeni problemi pravne prirode i različita tumačenja određenih zakonskih odredbi između Ministarstva i Agencije za državnu službu. Tako npr. nije jasno da li kandidati za načelnike koji su prošli proceduru u SKVP-u mogu na taj način biti prihvaćeni ili se pak mora sprovesti nova procedura. U odnosu na vojna lica, završen je proces postavljenja svih generala, a što je i usporilo cjelokupni proces popune. Mišljenja je da bi do sredine mjeseca septembra tekuće godine mogla ostvariti tražena stopa popune od 65%.

Enes Bećirbašić istaknuo je da i od drugih institucija zavisi brzina popune Ministarstva odbrane BiH, navodeći pri tome Agenciju za državnu službu kao i entitetska ministarstva odbrane. Stoga je mišljenja da je rok za utvrđenu obavezu popune ljudstvom do sredine mjeseca preambiciozan.

Boško Šiljegović istaknuo je da je iz Informacije vidljivo da je trenutna stopa zaposlenosti 43%. Stoga ga je zanimalo da li se s tim brojem osoba mogu ostvariti zadaci postavljeni pred Ministarstvo odbrane i kada je krajnji rok za izvršenje tih obaveza. Zanimalo ga je i da li je Komisija za reformu odbrane upoznata s ovakvim rezultatima popune, da li postoje problemi između partnera oko popune čelnih pozicija u Ministarstvu, te u kojoj je mjeri izvršen transfer osoba iz SKVP-a u Ministarstvo odbrane BiH.

Seada Palavrić izrazila je nezadovoljstvo i zabrinutost ovakvim stanjem popune ljudstvom Ministarstva odbrane BiH. Još u aprilu tekuće godine izmjenama Zakona o državnoj službi omogućen je prelazak osoba iz entitetskih ministarstava u državno. Također nije još sačinjen ni Pravilnik o plaćama profesionalnih vojnih osoba. U odnosu na nacionalnu zastupljenost, mišljenja je da se ona mora poštovati u svakom slučaju i da se stvara problem koji ne postoji. Također je istaknula i da je Ministarstvo odbrane BiH tek sada raspisalo konkurs za transfer ljudi iz entitetskih ministarstava iako su postojali uslovi da to uradi ranije. Stoga, sve probleme treba nastojati prevazići u što kraćem roku.

Vinko Radovanović naveo je da je Zajednička komisija iste odgovore dobila i na prethodnoj sjednici. Predložio je zaključak kojim bi se Ministarstvo odbrane BiH obavezalo da do kraja septembra ove godine izvrši popunu ljudstvom u procentu od 65%.

Boško Šiljegović, u kontekstu rasprave, informirao je članove Zajedničke komisije o zaključku 39. sjednice Predstavničkog doma, kojim je obavezana Zajednička komisija da u roku od 3 mjeseca, koji ističe 25.09.2004. godine, sačini cjelokupan izvještaj o stanju u oblasti odbrane i sigurnosti, s osvrtom na sve bitne aspekte proistekle iz te rasprave. Kako i popuna ljudstvom Ministarstva odbrane BiH treba biti tretirana izvještajem, predložio je slijedeći zaključak:

Od Ministarstva odbrane BiH, koje saglasno svojoj nadležnosti treba uključiti i izvještaje entitetskih ministarstva odbrane, te Ministarstva sigurnosti BiH, koje treba sublimirati izvještaje svih institucija za koje je nadležno ovo ministarstvo, kao što su: Interpol, Državna granična služba, SIPA, policija i dr., zahtijeva se da Zajedničkoj komisiji u roku od 15 dana dostave cjelokupan izvještaj o stanju u tim institucijama, sa osvrtom na sva bitna pitanja vezana za njihov rad, pogotovo pitanja koja su uslov za prijem BiH NATO programu-Partnerstvo za mir, Evropskoj uniji i drugim međunarodnim asocijacijama.

Zajednička komisija će potom Predstavničkom domu i Domu naroda dostaviti predmetni izvještaj.

Adem Huskić mišljenja je da o ovom pitanju postoje određeni problemi koji se ne mogu uočiti u dostavljenoj Informaciji. Stoga je predložio zaključak kojim se izražava nezadovoljstvo brzinom

popune ljudstvom Ministarstva odbrabne BiH, naglašavajući da je potrebno utvrditi rok za izvršenje te obaveze.

Branko Zrno istaknuo je da je stanje u Ministarstvu odbrane isto kao i ranije, te da su razlozi za to subjektivne ali i objektivne prirode. O razlozima slabe popunjenosti Ministarstvo bi moralo informirati članove Zajedničke komisije na sledećoj sjednici, jer se nema više šta čekati. U odnosu na pitanje da li je Komisija za reformu odbrane upoznata sa ovakvim rezultatima popune ljudstvom, informirao je da se rasprava o tom pitanju do sada izbjegavala, ali da će on to pitanje postaviti na slijedećoj sjednici te Komisije.

Šefik Džaferović mišljenja je da u svim institucijama BiH nedostaje radne atmosfere, što rezultira problemima na koje nailazimo. Na ovoj sjednici konkretno, treba izraziti nezadovoljstvo dosadašnjim stepenom popune ljudstva u Ministarstvu odbrane, te usvojiti zaključak kojim se zahtijeva popuna traženih kapaciteta planiranom dinamikom, a najkasnije do kraja septembra mjeseca tekuće godine. Ukoliko Ministarstvo odbrane prilikom popune ima problema, treba se obratiti Komisiji kako bi se isti zajednički riješili.

Momčilo Novaković istaknuo je da Ministarstvo odbrane velikim dijelom nije moglo uticati na popunu obzirom da su generalske pozicije popunjene relativno kasno, te da se bez ikakvih ultimativnih zahtjeva od ovog ministarstva treba zahtijevati da do kraja septembra tekuće godine izvrši popunu ljudstvom u traženom procentu.

Po okončanoj raspravi Boško Šiljegović formulirao je prijedloge zaključaka koje su članovi Zajedničke komisije jednoglasno usvojili, a glase:

1. Zajednička komisija izražava nezadovoljstvo dosadašnjim stepenom popunjenosti ljudstvom Ministarstva odbrane BiH.
2. Zajednička komisija zahtijeva od svih učesnika involviranih u proces popune ljudstvom Ministarstva odbrane BiH, da se zahtjevani procenat popune ljudstvom od 65% okonča do kraja mjeseca septembra tekuće godine.
3. Zahtijeva se od Ministarstva odbrane BiH da odmah izvjesti Zajedničku komisiju o eventualnim problemima koji mogu onemogućiti popunu ljudstvom Ministarstva odbrane BiH u traženom roku.
4. Od Ministarstva odbrane BiH, koje saglasno svojoj nadležnosti treba uključiti i izvještaje entitetskih ministarstva odbrane, te Ministarstva sigurnosti BiH, koje treba sublimirati izvještaje svih institucija za koje je nadležno ovo ministarstvo, kao što su: Interpol, Državna granična služba, SIPA, policija i dr., zahtijeva se da Zajedničkoj komisiji u roku od 15 dana dostave cjelokupan izvještaj o stanju u tim institucijama, sa osvrtom na sva bitna pitanja vezana za njihov rad, pogotovo pitanja koja su uslov za prijem BiH NATO programu-Partnerstvo za mir, Evropskoj uniji i drugim međunarodnim asocijacijama.

Zajednička komisija će potom Predstavničkom domu i Domu naroda dostaviti predmetni izvještaj na razmatranje.

Ad.4. Razmatranje Prijedloga zakona o Državnoj graničnoj službi

Zbog postavljenog pitanja od strane Seade Palavrić da li se predstavnici DGS-a mogu naći u ulozi zastupnika predlagača zakona, **Robert Perić i Dragiša Samardžija**, prije početka rasprave, istaknuli su da su ovlašteni od resornog Ministarstva sigurnosti BiH, čiji predstavnici nisu mogli prisustvovati ovoj sjednici, da se pred Zajedničkom komisijom nađu u ulozi zastupnika predlagača Prijedloga zakona o Državnoj graničnoj službi i Prijedloga zakona o nadzoru i kontroli prelaska državne granice.

Potom su ukratko obrazložili razloge donošenja Prijedloga zakona, te njegove principe.

U raspravi o predloženom Zakonu članovi Zajedničke komisije postavljali su pitanja predstavnicima DGS-a.

Osmana Brku zanimala je struktura zaposlenih DGS-a, kao i nacionalna struktura na rukovodnim nivoima, na što je predstavnik DGS-a odgovorio da je zastupljenost utvrđena prema popisu stanovništva iz 1991. godine.

Seada Palavrić je predložila da se, zbog velikog broja uloženi amandmana na Prijedlog zakona, te situaciju u odnosu na njegov član 6. koji je Prijedlogom zakona drugačije formuliran od strane Vijeća ministara nego je to predložila DGS-a, rasprava prolongira za petak koji slijedi, te da predstavnik Vijeća ministara BiH, odnosno ministar sigurnosti BiH bude upoznat s amandmanima i neizostavno prisustvuje toj sjednici Zajedničke komisije.

S ovim prijedlogom bio je saglasan i **Halid Genjac**.

Šefik Džaferović naglasio je da je razmatranje predmetna dva zakona uvršteno u dnevni red sjednice Predstavničkog doma koja se trba održati 07.09.2004. godine. Stoga bi se zbog poštovanja poslovnčkih rokova na sjednici koja je u toku trebali izjasniti o principima zakona, a eventualno raspravu o amandmanima odgoditi najkasnije za četvrtak.

Vinko Radovanović, Momčilo Novaković i Anto Spajić, bili su suprotnog mišljenja, jer po njima ne postoji toliko veliki broj amandmana, tako da bi raspravu o oba predložena zakona trebalo okončati na predmetnoj sjednici bez ikakvog odlaganja.

Kako su bila dva suprostvaljena prijedloga o daljem načinu rada na ovoj sjednici, **Branko Zrno** istaknuo je da nema potrebe glasati o ova dva prijedloga, pogotovo što se situacija može prevazići amandmanom Vinka Zorića na član 6. Prijedloga zakona.

Potom je na traženje Adema Huskića određena pauza u trajanju od 10 minuta.

Nakon okončane pauze **Boško Šiljegović** informirao je prisutne da su članovi Zajedničke komisije, nakon konsultacija sa predstavnicima DGS-e i OHR-a, postigli saglasnost o nastavku i okončanju rada po predmetnoj tački dnevnog reda na ovoj sjednici Komisije.

Članovi Zajedničke komisije su potom jednoglasno usvojili principe Prijedloga zakona.

Nakon usvajanja principa otvorena je rasprava o uloženi amandmanima na Prijedlog zakona, s rezultatima kako slijedi.

Član 3.

Od amandmana I. odustao predlagач Vinko Radovanović.

Član 6.

Amandman I. Vinka Zorića usvojen je jednoglasno u slijedećem tekstu:

U članu 6. iza tačke 1. dodaje se nova tačka 2. koja glasi:

«Struktura terenskih ureda i jedinica odražava nacionalnu strukturu stanovništva unutar njihovih područja odgovornosti.», dok se ostale tačke pomjeraju za jedan.

Sadašnja tačka 2. člana 6. postaje tačka 3., a njena prva rečenica mijenja se i glasi:

«Zastupljenost svakog od konstitutivnih naroda BiH na svim nivoima ne može biti ni u kom slučaju veća od 2/3, niti manja od 1/10 od ukupnog broja osoblja DGS-a.»

Član 7.

Amandman I. Kluba delegata srpskog naroda, usvojen je jednoglasno u slijedećem tekstu:

U članu 7. tačka 5. alineja c). postaje tačka 6., dok se ostale tačke pomjeraju za jedan.

Član 8.

Amandman II. Kluba delegata srpskog naroda usvojen je jednoglasno u slijedećem tekstu:

U članu 8. stav 3. poslije broja 5. brisati veznik "i" i umjesto njega staviti zarez, a poslije broja 6. dodati riječi "i 7."

Član 10.

Amandman III. Kluba delegata srpskog naroda usvojen je jednoglasno u slijedećem tekstu:

U članu 10. stavu 1. iza riječi "centralnih" dodaje se riječ "regionalnih".

Od amandmana IV. Kluba delegata srpskog naroda predlagач je odustao.

Član 13.

Od amandmana V. Kluba delegata srpskog naroda predlagач je odustao.

Član 15.

Od amandmana VI. Kluba delegata srpskog naroda predlagач je odustao.

Član 16.

Od amandmana VII. Kluba delegata srpskog naroda predlagач je odustao.

Član 17.

Od amandmana VIII. Kluba delegata srpskog naroda predlagač je odustao.

Od amandmana IX. Kluba delegata srpskog naroda predlagač je odustao.

Član 21.

Amandman I. Vinka Radovanovića usvojen je sa 6 glasova za i 5 glasova protiv, u slijedećem tekstu:

Član 21. mijenja se i glasi:

«Dok se ne osigura sjedište na lokaciji Aerodrom Sarajevo, DGS ima privremeno sjedište u Sarajevu Republike Srpske».

Amandman I. Seade Palavrić odbijen je sa 5 glasova za i 6 glasova protiv.

Član 22.

Amandman X. Kluba delegata srpskog naroda odbijen je sa 3 glasa za, 3 glasa protiv i 5 uzdržanih glasova.

Amandman XI. Kluba delegata srpskog naroda uz manju preformulaciju suvojen je sa 7 glasova za i 4 glasa protiv, u slijedećem tekstu:

U članu 22. iza dosadašnjeg stava 2. dodaje se novi stav 3. koji glasi :

«Izuzetno od člana 14. stav 3. ovog zakona, za prvo imenovanje pomoćnika direktora , kandidati za tu poziciju ne moraju ispunjavati uslov od tri godine rada u činu glavnog inspektora.»

Dosadašnji st. 3., 4. ,5. i 6. postaju st. 4., 5., 6. i 7.

Nakon okončane rasprave o amandmanima, članovi Zajedničke komisije usvojili su Prijedlog zakona u cjelini sa 10 glasova za i 1 uzdržanim glasom Šefika Džaferovića koji je ovakav vid svog izjašnjavanja obrazložio povredom Ustava BiH, te isti uputili u dalju parlamentarnu proceduru

Ad. 5. Razmatranja Prijedloga zakona o nadzoru i kontroli prelaska državne granice

Članovi Zajedničke komisije nakon kraće rasprave, jednoglasno su usvojili principe Prijedloga zakona, nakon čega su se izjašnjavali o ulozenim amandmanima.

Član 2.

Amandman I. Halida Genjca usvojen je sa 10 glasova za i 1 uzdržanim glasom, u slijedećem tekstu:

U članu 2. Prijedloga zakona iza stava 1. dodaje se stav 2. koji glasi:

«Odredbe ovog zakona ne utiču na odgovornost organa vlasti, a posebno Državne granične službe, koju imaju prema zakonima u BiH i Konvenciji o statusu izbjeglica iz 1951. godine i njenim Protokolom iz 1967. godine. Ovi organi su naročito dužni da poštuju princip zabrane vraćanja i zabrane sankcioniranja zbog nelegalnog ulaska ili prisustva u zemlji osoba koje traže azil i izbjeglica, kako je propisano Zakonom o kretanju i boravku stranaca i azilu.»

Od amandmana I. koji se odnosio na zamjenu riječi «međunarodni» riječju «međudržavni», odustao je predlagač amandmana Vinko Zorić.

Član 7.

Amandman II. Vinka Zorića nakon preformulacije usvojen je jednoglasno, u slijedećem tekstu:

U članu 7. na kraju stava 3. riječi «sve vrste prijevoznih sredstava» zamijeniti riječima

«primjerena prevozna sredstva».

Član 30.

Amandman III. Vinka Zorića usvojen je jednoglasno, u slijedećem tekstu:

U stavu 2. člana 30. na kraju iza riječi «pomagala» veznik «i» zamijeniti zarezom, a iza riječi «pse» zarez zamijeniti veznikom «i».

Član 39.

Amandman IV. Vinka Zorića usvojen je sa 5 glasova za, 1 glasom protiv i 3 uzdržana glasa, u slijedećem tekstu:

U članu 39. stav 5. riječ «nemaju» zamjenjuje se riječju «imaju».

Član 47.

Amandman V. Vinka Zorića usvojen je sa 7 glasova za, 2 glasa protiv i 1 uzdržanim glasom, u slijedećem tekstu:

U članu 47. nakon riječi «a prema važećim zakonima u BiH» staviti tačku i brisati ostali dio.

Član 49.

Amandman VI. Vinka Zorića usvojen je sa 5 glasova za, 1 glasom protiv i 4 uzdržana glasa, u slijedećem tekstu:

U članu 49. stav 1. nakon riječi «unutrašnjih poslova» staviti tačku i ostali dio rečenice brisati.

Po završenoj raspravi o amandmanima, članovi Zajedničke komisije usvojili su jednoglasno Prijedlog zakona u cjelini i uputili ga u dalju parlamentarnu proceduru.

Ad.6. Razmatranje i sublimiranje poslaničkih prijedloga zaključaka proisteklih prilikom rasprave na Predstavničkom domu o Informaciji o stanju sigurnosti BiH

Boško Šiljegović informirao je članove Zajedničke komisije o zaključku 41. sjednice Predstavničkog doma, održane 27. 07.2004. godine, kojim je Zajedničkoj komisiji kao nadležnoj, naloženo da razmotri sve poslaničke zaključke predložene prilikom rasprave o Informaciji o stanju sigurnosti BiH, te da za Predstavnički dom pripremi izvještaj s prijedlogom zaključaka.

Vinko Radovanović postavio je pitanje o nadležnosti ove komisije da raspravlja o zaključku Predstavničkog doma, jer članovi Komisije iz Doma naroda nisu sudjelovali u pomenutoj raspravi i nisu upoznati sa svim prijedlozima zaključaka.

Momčilo Novaković istaknuo je da je neupitna nadležnost Zajedničke komisije u ovom slučaju. Kako je dostavljeni transkript navedene sjednice Predstavničkog doma obiman sa dosta zaključaka a radi lakšeg i efikasnijeg rada, predložio je da eventualno predsjedavajući i dva zamjenika predsjedavajućeg Zajedničke komisije pokušaju razmotriti sve predložene zaključke, te da sačine odgovarajući radni prijedlog zaključaka koje bi Zajednička komisija potom razmatrala.

Vinko Zorić i Osman Brka bili su u potpunosti saglasni s mišljenjem prethodnika o potrebi formiranja uže radne grupe koja bi pripremila radni prijedlog zaključaka za Zajedničku komisiju.

Po okončanoj raspravi članovi Zajedničke komisije jednoglasno su usvojili zaključak da uža radna grupa u sastavu Momčilo Novaković, Seada Palavrić i Vinko Zorić do slijedeće sjednice Zajedničke komisije, pripremi radni prijedlog zaključaka koji će potom biti razmatrani na Komisiji.

Ad.7. Tekuća pitanja

Boško Šiljegović informirao je članove Zajedničke komisije o posjeti delegacije Parlamentarne skupštine NATO-a u vremenu od 19. do 22.09.2004. godine i njihovoj spremnosti za susret s članovima Zajedničke komisije. Istaknuo je da je Služba protokola predložila da se susret održi 21.09.2004. godine, ali se navedeni termin kao i ostali detalji nisu još uvijek sa sigurnošću dogovorili.

Na kraju je jednoglasno prihvaćeno da predsjedavajući Zajedničke komisije usaglasi sva pitanja vezana za predstojeću posjetu i obavjesti članove Komisije o tome.

Zapisnik sačinila:
Dragica Hinić

Privremeni predsjedavajući
Zajedničke komisije:
Boško Šiljegović